

29.september

**Uunga siunnersuut: Kalaallit Nunaannut suliffissarsiortut killilersimaarneqarnissaat pillugu Inat-
sisartut inatsisaata allanngortinneqarneranik Inatsisartut inatsisaat nr. xx, xx 2016-imeersoq
(Atuuffia aamma ilinniakkat allat, nalunaarusiortarneq il.il.)**

(Inuussutissarsiornermut, Suliffeqarnermut Niuernermut Nunanullu Allanut Naalakkersuisoq)

Nunatsinni suliffiit ilaasa pisariaqartippaat avataanniit sulisussaqaqtariaqarneq, tamanna nunatsinni ilinniagaqarnissamik piumasaqaatitalimmik pisariaqartitsiviusunut sammivilersuinissamik ingerlat-sinissamik annertusisamik pisariaqartitsiviuvoq.

Siumumiit nuannaarutigisatsinni ukiuni kingullerni inuussutissarsiornikkut suliffissaqaqtitsiniar-nikkullu suliniutinik arlaqartunik nutarterinermik nassataqarfiusumik ingerlatsiviuvoq. Nunatsinni nittartakkat atorluarneralugit nuttarsinnaaneq annertunerusumik aqqtissinneqarpoq. Inatsisit nutarteriffiullutik atuutilersut aqqtigalugit suliniutit malunnaatilimmik takussutissaqarfiusumik kinguneqartalernissaat malinnaavigissavarput.

Taamaattorli arajutsisimangilarput neriniartarfinni akunnittarfinnilu sulisorineqartartut akornanni nunani allaneersut nunatsinnukartartut ersittumik takussaajartortut, tamannalu pisussaaffiliuvoq Kalaallit Nunaannut suliffissarsiortut killilersimaarnissaat pillugu annertusisamik nakkutilliisoqar-tariaqarnerannik soorluttaaq nunaqavissut salliutillugit pisussaaffiusumik sulinissaat anguniartuarta-riaqarigut.

Ilinniagaqarlutik naammassisartut amerliartortillugit pingaaruteqarpoq nunatsinni annertusiartor-tumik nunaqavissut salliutillugit nammineq suliffeqarfinni pisariaqartitat matussuserneqarnissaat, tamanna nunani allani atuuppoq soorluttaaq nunatsinni pingaartillugu siunnerfilimmik ingerlat-sinikkut matussuserneqartariaqartoq.

Siumumiit arajutsisimangilarput inunnik isumaginnittoqarfinni sulisussat amigaatigineqarmata, sulisussanilli amigaateqarneq matussuserniarlugu akissaatit atukkallu ikaarsaariarfilerlugit ingerlat-siviusariaqartut isumaqaratta, taamaattorli isumakulunnartoqartipparput siunnersuummi siunnersuu-tigineqartumi inunnik isumaginnittussatut aamma isumaginninnermi siunnersortissatut ilinniaga-qartut peerneqarniarmata taamaasilluni avataanniit tikisitsinissaq ajornannginnerusumik ingerlanne-qarsinnaalissallutik.

Pingaaruteqarpoq avataanniit tikisitsisarnerit sapinngisamik pakkersimaassallugit ikaarsaariarnerin-narmilu nunatsinni nammineq aaqqiinissap tungaanut killilerlugit pilersaarutitalimmik ingerlatsi-viginissaat pisariaqarmata. Taamaattorli isumaginnittoqarfinni pisariaqartitsineq maanna atuuttoq takusinnaavarput taamaattumik Siumumiit suleqataaffigissavarput aaqqiisoqarnissaanik siunner-filimmik ingerlatseqataanikkut.

Siumumiit pingartipparput avataanniit suliaartortitsilluni tikisitsisarnerit qanimut sukumiissumik nalunaarusiortarnikkut malinngiivigineqassasut tamannalu siunnersuummi ilaammat iluarisimaarlugu kaammaattuutigissavarput Naalakkersuisut nalunaarusiortarnermut pisinnaatitaalernerisa kingunerisaanni suleriaqqinnissamut atugassanik nalunaarusioqqusinerit ingerlateqqullugit.

Taamatut oqaaseqarluta aalajangiiffigisassatut siunnersuut ilalerlugu matumuuna ataatsimiititalia-
mut susassaqtumut sukumiissumik misissorluarneqarnissaanut suliniuteqarfigisassanngorlugu
ingerlatinneqassasoq Siumumiit inassutigissavarput.

Suka K.Frederiksen

Siumut